

ପ୍ରବନ୍ଧ-ମାଳା

(ପାରିଶିଷ୍ଟ-୧)

ଡଃ କାଳୀପ୍ରସାଦ ସିଂହ

ଅଜ୍ଞା ବାବାଇମେନା ପ୍ରକାଶନୀ

କଟକ

ଡାକ୍ତରୀ, ନିଳଚର-୧୯୮୦୦୧



ক্রিয়াত ছ-ব্যবহার

১। ভূমিকা

ক্রিয়ার বানানর ব্যাপারে বর্তমানে মতভেদ আহানির সৃষ্টি আছে। আছে, আছে, খাছে, পাছে, অছিল, আছিল, খাছিল, পাছিল--এসাদে ক্রিয়াত ছ-বর্ণ ব্যবহার করানি এহানেই সাধারণ রীতিহান। কিন্তু কুনো কুনো লেখকে এসাদে ক্রিয়া এতা স-বর্ণলো ইকরতারা; যেমন—অসে, আসে, খাসে, পাসে; অসিল, আসিল ইত্যাদি। ফলে ক্রিয়ার বানানর ক্ষেত্রেত শ্রীট আহানর সৃষ্টি আছে। আমি বিভিন্ন গ্রন্থত বারো প্রবন্ধত* এসাদে ক্রিয়াত ছ-বর্ণ ব্যবহার করানি এহানেই বিজ্ঞান সন্নতহান বুলিয়া প্রতিপাদন করেছি। কিন্তু দন্ত্য-স-বাদর প্রতিষ্ঠাতা গিরকগাছিয়ে তাহুর পাণ্ডিত্যর ভাবমূর্তি অটুট থনারতা নীরবে ইমে তাহুর মত উহানলো চলেছি। অবশ্যই তাহুর অনেক ছ-বর্ণর যুক্তিযুক্ততা হারপেইতারা, কিন্তু হঠাৎ মত-পরিবর্তন করতে তাহুরতা লাজ হমার। দন্ত্য-স-বাদীর হাবিত ডাঙর থিয়োরিহান অইলতাই—‘খনো এগোতে আমার সংঘর মুরুছিগো; গতিকে তার মত এহান ইমে চুম বুলানি লাগতই। বারো গিরি এগোতে হোতার সংঘরগোনা; স্মতরাং তার মত উহান ইমে ভুল বুলানিয়েই থক।’ মূলে দন্ত্য-স-বাদর উৎপত্তি আছেতাউ সংঘবোধেত্ত। এ মতবাদর অগ্র-স্থানীয় গিরকগাছির প্রায় হাবিয়েউ আগে ক্রিয়াত ছ-ব্যবহার করলাগো। ১৯৬৭-৬৮ ইংরাজীত ‘হো’-সংঘর হার-বো-নেই

*দ্রঃ—প্রবন্ধমালা, ১ম খণ্ড, পৃ. ২৯; প্রবন্ধমালা, ২য় খণ্ড, পৃ. ৩৪; বিষ্ণুপ্রিয়া মণিপুরী ভাষাতত্ত্বর রূপরেখা, পৃ. ৫৩।

শৌ আঙুলিয়ে থিয়োরি আহানি নিকালছিল হানতে
 তানুও তানুর পাণ্ডিত্য বারো সংঘর ইজ্জত বজায় থনারকা
 এ দন্ত্য-স-থিয়োরি এহান নিকাললাতা । দন্ত্য-স-বাদর যেতা
 যুক্তি তানু দেহেইতারা উতা হাবি বাহা কথা; আসল
 গুড়িগো আইলতায় হৌগো । কিন্তু সংঘবোধ বারো ইজ্জত
 বোধলো সত্যপ্রতিষ্ঠা নার; সত্যপ্রতিষ্ঠা অরতা নিরপেক্ষ
 বারো বৈজ্ঞানিক গবেষণাত । যেতায় সংঘর দায়ে বা ইজ্জতর
 দায়ে বৈজ্ঞানিক সত্য স্বীকার না করতারা উতা মিথ্যাচারী বারো
 প্রগতির পরিপন্থী । যেতাউ অক, আজি ক্রিয়াত ছ-ব্যবহারর
 পক্ষে আমার বক্তব্য উহানি বারো পুলকরে মাতিক ; সতানিষ্ঠ
 গিরিগিথানিয়ে এ মতর যৌক্তিকতা যাকরেদিলে আমার
 পরিশ্রমহান সার্থক অইতই ।

২। বিষ্ণুপ্রিয়া মণিপুরী ‘ছ’=সংস্কৃত ‘স’=ইংরাজী ‘S’

দন্ত্য-স-বাদীর প্রথম যুক্তিহান অইলতাই — উল্লিখিত ধ্বনি
 উহানি উচ্চারণ করতে সংস্কৃত বারো হিন্দী দন্ত্য-স-র-উচ্চারণর
 সাদে জুহান দাতে লাগের । সুতরাং এ ক্রিয়া এতা দন্ত্য-স-লো
 ইকরানি থকর ।

কিন্তু উচ্চারণর গজে নির্ভর করিয়া বানান লেপকরানির
 আগে বিষ্ণুপ্রিয়া মণিপুরী (বি. ম.) ভাষার উচ্চারণধারা,
 সংস্কৃত বারো হিন্দীর উচ্চারণ ধারা এবং এতার ভিতরে পরস্পর
 পার্থক্য উহানি হারপানি লাগের । সংস্কৃত উচ্চারণর লগে
 বি. ম.-র উচ্চারণ ধারার প্রচুর পার্থক্য আছে । সংস্কৃত
 উচ্চারণর ধারালো আমার বানান ঠিক করাত গেলগো

প্রায় হাবি শব্দর প্রচলিত বানান বদলানি লাগতই। কিন্তু উহান করলে সংস্কৃত বারো অক্ষর সংস্কৃত ভাষার লগে বি. ম.-র সম্বন্ধ দেহেইতে বারো ও ও ভাষা শিকা করতে অসংখ্য অসুবিধার সম্মুখীন অনা লাগতই। গতিকে সংস্কৃত বানানর আকার উতা যথারীতি থনা উহান নিতান্ত প্রয়োজনীয় হান। তবে সংস্কৃত বর্ণ উতা আমি কিসাদে উচ্চারণ করিয়ার উহান হারপেয়া ও সংস্কৃত বর্ণ উতার লগে বি. ম উচ্চারণর মিলন ঘটানি লাগতই। দৃষ্টান্তরূপে চেইক—সংস্কৃত দন্ত্য -স বারো মূর্ধনা - য উতা আমি সংস্কৃত তালবা - শ - র সাদে উচ্চারণ করিয়ার। গতিকে সংস্কৃত উচ্চারণর ধারালো আমার বানান ঠিক করানি অইলে সংস্কৃত আসন, ভূষণ, মহিষ, বাসক, রাস, প্রসাদ, সিংহ—এ শব্দ এতা আশন, ভূশন, মহিশ বাশক রশ, প্রশাদ, শিংহ এসাদে ইকরানি লাগতই। ঠিক উসাদে, সংস্কৃত বা প্রাকৃত ছ - বর্ণ এগো আমি সংস্কৃত দন্ত্য - স বা ইংরাজী S-অর সাদে উচ্চারণ করিয়ার। সংস্কৃত ছবি, ছাত্র, ছাত্রী, ছন্দ, ছাগী- ছত্র, ছায়া—এ শব্দ এতার ছ - বর্ণ এগো আমরাও সংস্কৃত বা হিন্দীর দন্ত্য - স - র সাদে উচ্চারিত অর। গতিকে সংস্কৃত বা হিন্দীর উচ্চারণ - ধারালো আমার বানান ঠিক করানি অইলে শব্দ এতা সবি, সাত্র সাত্রী, সন্দ, সাগী, সত্র, সায়া—এসাদে, ইকরানি লাগতই। সংস্কৃত শ য, স— এগিরে আমি তালবা - শ - রূপে, বারো সংস্কৃত ছ - এগোরো দন্ত্য - স অর্থাৎ ইংরাজী S - রূপে উচ্চারণ করিয়ার—এ বাস্তব সত্য এহান মানিয়া নিলেগা এসাদে বানান বিভ্রাট নাহের। এবং যেহেতু আছে, আছে, অছিল, আছিল, খাছে, খাছিল—ইত্যাদি শব্দর ছ-এগো S- অর সাদে উচ্চারিত অর, এপেই ছ-বর্ণ ব্যবহার করলে পূর্বোক্ত বানান উতার লগে সামঞ্জস্য থার। ‘আসন’

বারো 'খামে'—এ শব্দ দিয়ে গিও দন্ত্য-স-লো ইকরলে বর্ণ
আকগোরকা দিয়ে ফামে উচ্চারণ ছহান করনা করানি লাগতই।
উহানে, সংস্কৃত বারো অন্যান্য ভাষার লগে সামঞ্জস্য থনারকা
বারো উচ্চারণর সাম্য বজায় থনারকা উল্লিখিত ক্রিয়া উত্তম
ছ-বর্ণ বাব হার করানি এহানেই বুদ্ধিযুক্তহান।

দন্ত্য-স বাদীয়ে হাবিত ডাঙর বিদ্ভাট হান আনেছিতা
(ক) অছে, অছিল ইত্যাদি বারো (খ) আছে, আছিল
ইত্যাদি—এ দিয়ে ধরণর ক্রিয়ার ক্ষেত্রত। গতিকে এ দিয়ে
ধরণর ক্রিয়ার বানান তঙাল করে আলোচনা করিক।

৩।(i) অস্, অহ্-ধাতু লাগই, অ-ধাতু

৮ সংস্কৃত ভব

অছে, অছিল, অছু ইত্যাদি ক্রিয়াত দন্ত্য-স বাদীর বুদ্ধিহান
অইলগই—এ ক্রিয়া এতার ধাতুগো উনি 'অস্'-ধাতু বারো
ধাতু এগো উনি সংস্কৃত 'অস্'-ধাতু উগোও অবিকল আছেছেগো।
খানিগারা ভিতরে হমেয়া তেইলে দেখতাড়াই যে, ধাতুর প্রাথ-
মিক জ্ঞান থাইলেউ কুনোগোই এসাদে মত পোষন করে
চুরারতারা। ধাতু বুলতারা এগো ক্রিয়া আহানর হাবি রূপর
সাধারণ ধনিগো। অর্থাৎ ক্রিয়া আহানর হাবি রূপর ভিতরে
থার সাধারণ রূপ উহানরে ধাতু বুলতারা। যেমন—

(ক) কর্-ই/এ ছল, কর্-ই/এছে, কর্-ই/এছিলে, কর্-এর, কর-
উরি, কর্-অর, কর্-তই, কর্-তাড়াই, কর্-(ই) লো ইত্যাদি;
(খ) খা (এ) ছিল, খা-(এ) ছে, খা-(এ) ছিলে, খা-(এ) র,
খা-উরি, খা-(অ) র, খা (৭খ)-ইতই, খা (৭খ)-ইতাড়াই,
খা-(৭খ)-ইলো ইত্যাদি;

(গ) থ-(এ) ছিল, থ-(এ) ছে, থ-(এ) ছিলে, থ-(এ)র.থ-উরি,
থ-(অ) র,থ-ইতই, থ-ইতাঙাই, থ-ইলো ইত্যাদি;

(ঘ) পা-(এ)ছিল, পা-(এ)ছে, পা-(এ)ছিলে, পা-(অ)র,
পা-উরি, পা (পে)-ইতই, পা (পে)-ইতাঙাই, পা (পে)
-ইলো ইত্যাদি*—এ চারিযো ধরণের ক্রিয়ার প্রত্যেক ধরণের ক্রিয়ার
ভিতরে যেহানি সাধারণ রূপহানি, উতাই ধাতু, অর্থাৎ, এপেই
কর, থা, থ, পা—এহানিয়েই ধাতু। সিক উমাদে আমার
আলোচ্য ক্রিয়া উগি বিচার করলে দেখতাঙাই—অ-ছিল,
অ-ছিলে, অ-ছিলাই, অ-ছে, অ-ছত, অ-ছু, অ-ছি, অ-র,
অ-রাই, অ-ইতারা অ-উরি, অ-ইতৌ অ-ইতই, অ-ইতাঙাই—
ইত্যাদি হাবি রূপের ভিতরে সাধারণ রূপহান অইলতাই
'অ'। সুতরাং এপেই 'অ'- এগৌই ধাতুগো বারো ছিল, ছিলে,
ছে ছু, র, রাই, ইতারা, ইতৌ, ইতই—ইত্যাদি অইলতাই
বিভক্তি। এ ক্রিয়ার বর্তমান বারো ভবিষ্যতের রূপের
ভিতরে স/ছ ধনি এগৌই নেই। সুতরাং এপেই অস্-ধাতু
বুলিয়া মাতানি উহান অতি হবা ঠারলো মাততে গেলোগা—
'ছুপ না জানিয়া মাতানিহান'। এপেই অস্-ধাতু অইলে—
অতীতকালে অসেছিল, অসেছিলাঙ ইত্যাদি, বর্তমান কালে
অসুরি, অসরায় ইত্যাদি, বারো ভবিষ্যৎ কালে অসিতই,
অসিতৌ ইত্যাদি রূপ অইল অইছ।

* (১) অ-কারান্ত বা আ-কারান্ত ধাতুর পিছে বিভক্তির
আদি এ - কার লুপ্ত অর। (২) বাঞ্জনান্ত বা ই-কারান্ত ধাতুর
পিছে বিভক্তির আদি ই - কার লুপ্ত অর। (৩) ই - কার
পিছে থাইলে পূর্ববর্তী আ - কার এ - কারে পরিণত অর।—
দ্রঃ—বিশ্বপ্রিয়া মণিপুরী ভাষা শব্দরূপরেখা পৃ. ৫২—৬০,৮৭।

আরতাউ চেইক—অছে, অছিল— ইত্যাদি, ক্ষেত্রত যদি অস্-ধাতু অর, উহান অইলে পাছিল, পাছে, খাছিল, খাছে, করেছিল, করেছে ইত্যাদি খেত্রতো পাছ্, খাছ্, করেছ্—এতা ধাতু বুলানি লাগতই । উহান যে কতি ডাঙর পাণ্ডিত্যর পরিচয়হান অইতই উহান ধাতু বারো বিভক্তির বিচার খানিঙ্গারা করলেই হারপেইতাঙাই । তহুপরি, এ ধাতু এহানি সংস্কৃত প্রাপ্, খাদ্ বারো কৃ—এ ধাতু এহানির প্রাপ্তো (৭পা), খাদ (৭খা) বারো করো (৭কর্)—এরূপ এহানিত আহেছেহানি । এপেই মূল রূপ উতাত স / ছ-ধ্বনি নেয়োনিয়ে উল্লিখিত বি. ম. ধাতু উহানিত ধ্বনি এগো আহানির প্রশ্নই না উঠের । আসলে, এ ছ-ধ্বনি এগো পুরাঘটিত অতীত বারো পুরাঘটিত বর্তমানর বিভক্তির অন্তর্গতগো ।* উহানে, হাবি ক্রিয়ার পুরাঘটিত অতীত বারো পুরাঘটিত বর্তমানর রূপে এ ছ-ধ্বনি এগো পেয়ারতা । অর্থাৎ অছিল, অছে, অর, অইতই— ইত্যাদি ক্রিয়াত ছিল, ছে, র, ইতই — এতা বিভক্তি ; ধাতুগো অইলতাই ‘অ’ । ধাতু এগো আহেছেতা সংস্কৃত ভূ-ধাতুর ‘ভব’—রূপেত্ত : সং. ভব ৭ প্রাকৃত হো ৭ হিন্দী হো, বাংলা - অসমীয়া হ. বি. ম. অ ।

এপেই আরাক লক্ষণীয় বিষয় আহান অইলতাই— সংস্কৃত বা প্রাকৃত হ-ধ্বনি এগো বি. ম.-ত আয়া ‘অ’—ধ্বনিত পরিণত অর । এগো শুদ্ধ অ—ধ্বনিগো নাগই ; অ-ধ্বনির লগে আরাক ধ্বনি আহান (') খার, যোগেগোরে glottal closure বুলতারা । দৃষ্টান্ত আহানি চেইক—সং. হস্ত ৭ প্রা. হথ > হাত ৭ ‘আত’; * হল দীক ৭ হালদি > ‘আলদি ইত্যাদি ।

*দ্রঃ—বিষ্ণুপ্রিয়া মণিপুরী ভাষাতত্ত্বর রূপরেখা, পৃ. ৫৪—৫৬ ।

'অছে' 'অছ ইত্যাদি ক্রিয়াণৌ আমি ঠিক ধ্বনি এগো পেরার। সুত-
রাং এ ধাতুর 'অ-ধ্বনি এগো মূলে হ-ধ্বনিত অর্থাৎ প্রাকৃত হো—
ধাতুত আছেছেগো। উহানাত বিন্দু আহানৌ সন্দেহ নেই; বারো
এ হো-ধাতু এগো আছেছেতা সংস্কৃত 'ভব'-ত। গতিকে 'অ-ধাতু
এগো ঐতিহাসিক ধারালো সহজেই সংস্কৃত ভব-রূপেও য়ে য়ার।
ছে ছিল এতাবে বিভক্তি হিসাবে গ্রহণ করলে 'অ-ধাতুর এ
ব্যাক্যের লগে সম্পূর্ণ সামঞ্জস্য খার উহান অতি স্পষ্ট।

এপেই আরাক প্রশ্ন আহান আছে পারের যে এপেই ছে-
ছিল ইত্যাদি ধ্বনির বিভক্তি বুলিয়া গ্রহণ করলেউ, এতাত ছ-
বর্ণ গ্রহণ করানির যুক্তিহান কিহান? উহানর উত্তরহান অইল
তাই এহান—প্রথমতঃ এ ধ্বনি এতাত পূর্বোক্ত S- ধ্বনি উগো
আছে। সুতরাং এগো বি. ম.- র ছ- ধ্বনিগো। দ্বিতীয়তঃ এ
বিভক্তি এতা আছেছেতা ইয়া-প্রত্যয় বারো আছ-ধাতুর ক্রিয়া
রূপর মিলনেত। ★ যেমন—কর্ + ইয়া—আছ 7 করেছ,
পা + ইয়া— আছে 7 পাছে; গ্ + ইয়া— আছেগা 7 গেছেগা,
খা + ইয়া—আছিল > খাছিল ইত্যাদি। বারো এ আছ-
ধাতু আছেছেতা প্রাকৃত অছ-ধাতুত। সুতরাং উচ্চারণ- ধারা
বারো উৎস— এ দিয়ে। বারাদেত্তৌ এপেই ছ-বর্ণ দেনা
এহানেই যুক্তিযুক্তহান।

(ii) হিন্দীর লগে সম্বন্ধ দেহানি নিরর্থক

এ প্রশ্নে দম্ভ্য-স বাদীগাছির আরাক হাশ্বকর যুক্তি
আহান অইলতাই— বি. ম ভাষা এহান উনি হিন্দী বারো

৩৮—বিক্রিয়া মণিপুরী ভাষাতত্ত্বর রূপরেখা, পৃ. ৫৪—৫৫।

হিন্দীর উৎস শৌরসেনীর লগে মিল। বারো, আছে, অছিল ইত্যাদির উচ্চারণে হিন্দী দন্ত্য স-উগোর উচ্চারণহান পানাই উনি তানু খুপি লিওয়া উবা অছি তা — এপেই দন্ত্য-স-গো দেনা বুলিয়া।

হিন্দী বারো শৌরসেনীর লগে মিল দেহরানির পাগলামি উহানর উত্তর আমি অণ্ড্র দেছি*। তথাপি প্রসঙ্গক্রমে এপেই ছহান আহান কথা মাতিক। দন্ত্য-স-বাদীগাছির যুক্তিহানি অইলতাই এহানি—প্রথমতঃ, বি.ম. ভাষাত ক্রিয়ার আগে নঞর্থক শব্দর ব্যবহার অর, যেমন, না করলো, না খাছে, না যেইতইগা ইত্যাদি। দ্বিতীয়তঃ, ক্রিয়ার মাছে লিঙ্গভেদ আছে, যেমন — তা আহিল, তেই আহিলী ইত্যাদি। তৃতীয়তঃ, ক্রিয়াত বচন ভেদ আছে; যেমন, মি যাউরিগা, আমি যিয়ারগা ইত্যাদি। লক্ষণ এতা হিন্দীত থানাই বি. ম. ভাষা এহান উনি হিন্দীর সমগোত্রীয়হান বারো হিন্দীর সাদে শৌরসেনীত আহেছেহান। কিন্তু গিরকগাছির মত এহান অণ্ড্রভাষার লগে তুলনামূলক আলোচনার অভাবেত্ত নিকুলেছেহান। ক্রিয়ার আগে নঞর্থক শব্দ ব্যবহার করানি উহান সংস্কৃত প্রাকৃত বারো আধুনিক ভারতীয় হাবি আৰ্য ভাষার সাধারণ লক্ষণহান; অসমীয়া, বাংলা, উড়িয়া ইত্যাদি ভাষাতো এ লক্ষণ এহান আছে। আধুনিক বাংলাত এ লক্ষণ এহান মিয়াম নেয়ইলেউ, প্রাচীন বারো মধ্যযুগীয় বাংলাত এহান বহুল পরিমাণে পেয়ার। ছদ্ম নঞর্থক শব্দগো ক্রিয়ার আগে থানা উহানেই নাগই, অবিকল বি. ম. শব্দই পুরানা বাংলাত আছে, যেমন — নাইল (আধুনিক বাংলা — আসিল না), না যায়

*দ্রঃ—The Bishnupriya Manipuris, পৃ. ৯-১১।

(আধুনিক বাংলা, যায় না) ইত্যাদি। ক্রিয়াত লিঙ্গভেদর লক্ষণ উহানো সংস্কৃত, প্রাকৃত এবং প্রাচীন বারো মধ্যযুগীয় বাংলাতেও আছে। প্রাচীন বাংলাতেও তদ্দা লক্ষণ উহানিয়েই নাগই, অবিকল বি. ম. রূপ উঠাউ আছিল। যেমন, আইল, আইলী, গেল, গেলী, চলিলী ইত্যাদি। * ক্রিয়াত বচনভেদর লক্ষণ উহানো সংস্কৃত বারো প্রাকৃতও আছে ছেহান। উড়িয়া-ভাষাতেও ক্রিয়াত বচনভেদ আছে; যেমন—মু জায় = মি যাউরিগা, আমে জাও = আমি যিয়ারগা, মু জাইখিলি = মি গেছিলুগা, আমে জাইখিলু = আমি গেছিলাঙগা ইত্যাদি। সুতরাং উপরোক্ত লক্ষণ উহানি হিন্দীর বিশেষ লক্ষণহানি নাগই, এবং ও লক্ষণ উহানি বি. ম.-ত থানাই বি. ম. ভাষাউ হিন্দীর সমগোত্রীয়হান বুলানির বিন্দু আহানো যুক্তি নেই।

তত্পরি তদ্দা সাধারণ লক্ষণ আহানির মিল থাই-লেই ভাষা দুহান সমগোত্রীয় বুলানির কোনো যুক্তি নেই। জার্মানী ভাষাত ক্রিয়ার ভিতরে বচনভেদ আছে বুলিয়া জার্মানীর লগে বি. ম. সমগোত্রীয় বুলিয়া মাতানি উহান খানিমানি পাগলামিহান নাগই। বি. ম. বারো হিন্দীর ক্ষেত্রেও একেই যুক্তি প্রযোজ্য। আসলে, ভাষার পরস্পর সম্বন্ধ বিচারে চানার মূল বিষয়হানি অইলতাই শব্দ বা বিভক্তির আকৃতি উতা। এবং শব্দ বা বিভক্তির আকৃতি বিচার করলে দেখতাঙাই যে, বি. ম. ভাষারত হিন্দীর লগে শতকরা বিশভাগো মিল নেই; অনাগদে অসমীয়া, বাংলা বারো উড়িয়ার লগে শতকরা প্রায় আশিভাগ মিল। ক্রিয়ার প্রসঙ্গ উঠেছে যখন, তদ্দা ক্রিয়ার দৃষ্টান্ত খানিয়েই লইক —

*দ্রঃ—বিষ্ণুপ্রিয়া মণিপুরী ভাষাতত্বর রূপরেখা, পৃ. ৫৩, ৫৬।

বি.ম. — কররি, করেৱ, করতারা; করিছিল, করিছিলু, করেছিল, করেছিলু, করেছিলাও; করতাঙাই, করিম, করব ইত্যাদি।

বাংলা — করি, করে (পূ. বঙ্গ-করেৱ), পূ. বঙ্গ করতারা; করেছিলো, করেছিলু, করেছিলাম, পূ. বঙ্গ— করতাম, করব ইত্যাদি।

অসমীয়া— করেঁ, করে, করিছিল, করিছিলু; করিম, করিব ইত্যাদি।

হিন্দী — কররহা হুঁ, কররহা হৈ, কররহে হৈ; কিয়াথা, কিযে থে; করুঁগা, করেঁগে ইত্যাদি।

এসাদে হাজার হাজার ক্রিয়ার আকার এবং সর্বনাম এবং শব্দরূপ তুলনা করলে মেরাজাউরে পেয়াটে মাতে পারতই যে, বি.ম.-র লগে হিন্দীর সম্বন্ধহীন অনেক দূরেই। এ আলোচনা দীর্ঘতর করিয়া সময় না মাও করিক। যেতাউ অক. বি.মি. ভাষার লগে হিন্দীর নৈকটা মানিয়া লইলেউ, আলোচ্যমান ধাতুর ক্ষেত্রে গিবকগাছিব হিন্দী বা শৌরসেনী ভক্তির তাৎপর্গাহীন হারপানি মিয়াম চিলছে। কারণ, প্রথমতঃ, হিন্দীত আছে, আছে ইত্যাদি ক্রিয়ার গন্ধহানো নেই। দ্বিতীয়তঃ, সংস্কৃত অস্-ধাতুর প্রসঙ্গ তুললেউ, জৈন মহারাষ্ট্রী, মাগধী, পৈশাচী ইত্যাদি ভাষার সাদে শৌরসেনীতো ধাতু ঔগো অচ্ছ - ধাতুত পরিণত অর [দৃষ্টব্য— 'অস্তুরচ্ছঃ' — প্রাকৃত প্রকাশ, ১২ . ১৯]। কিন্তু, ঔ অচ্ছ-রূপ উহান হিন্দীত রক্ষিত নাছে; হিন্দীত ঔ ধাতুর অর্থত পেয়ারতাই হো - ধাতু, যেগো আহেছেতা সংস্কৃত ভব-রূপেত্ত। গতিকে কল্পিত অস্-ধাতুর বাখ্যারকা হিন্দী বা শৌরসেনী হা তারেয়া ইমে আশ্রানে হিনপানির প্রয়োজন নেই।

৪। আচ্-ধাতু আহেছেতা প্রাকৃত

অচ্-ধাতুত

দন্ত্য-স-বাদী গিরকগাছিয়ে আরাক আকবেদে বারো মাততারাভাই — আছে আছিল, আছু, আছত ইত্যাদি ক্রিয়ার ধাতু আচ্ এগো উনি আহেছেতা সংকৃত অস্-ধাতুত । গতিকে তাম্রর মতে ক্রিয়া এতার ধাতুগো উনি আস্ এবং ঐ অণুযায়ী ক্রিয়া এতা উনি আনে, আমিল, আসত—এসাদে ইকরানি থকর ।

এ বিষয় আলোচনার আগে পইলাই হারপানি থকর যে তদ্রূপ শব্দ বা ধাতু এতা — হাবি ভাষাগো — সংকৃতত সৃজাসৃজি আহেছেতা নাগই ; আহেছেতা প্রাকৃতর মাধ্যমে । বিশেষ করিয়া এহানো হারপানি থকর যে আধুনিক নামধাতু, হুহান আহান ছাড়া হাবি বি. ম. ধাতু, তদ্রূপ ধাতু, অর্থাৎ ধাতু এতা সংকৃতত আহেছেতা প্রাকৃতর মাধ্যমে । অথচ প্রাকৃতত অস্-ধাতুর প্রয়োগেই নেই । প্রাকৃতত সংকৃত অস্-ধাতুর অর্থত পেয়ারতা — অচ্-ধাতু । এ অচ্-ধাতু এহান মাগবী, শৌরসেনী, মহারাষ্ট্রী, জৈনমহারাষ্ট্রী, অবন্তী, পৈশাচী-ইত্যাদি প্রায় হাবি প্রাকৃতগো আছে । এ ধাতুর সাধারণ প্রাকৃত রূপ পেয়ারতা—অচ্ছই, অচ্ছসি, অচ্ছামি, অচ্ছন্তি, অচ্ছহ—এসাদে ; শৌরসেনী রূপ পেয়ারতা—অচ্ছদে, অচ্ছদি, অচ্ছন্তি—এসাদে ; পৈশাচী রূপ পেয়ারতা—অচ্ছতি, অচ্ছতে—এসাদে । বাংলা, অসমীয়া বারো বি. ম.-র আচ্-ধাতু আহেছেতা এ প্রাকৃত অচ্-ধাতুত । পিছে যুক্তবর্ণ থাইলে এবং ঐ যুক্তবর্ণ উতার ভিতরের বর্ণ আগো লোপ পেইলে আগেকার হ্রস্ব স্বর উগো দীর্ঘ অর — এহান ভারতীয়

আর্যভাষার বিবর্তনের সাধারণ সূত্র আহান । দৃষ্টান্ত স্বরূপে
 ঢেইক — সং. হস্ত > প্রা. হথ 7 হাথ 7 হাত 7 'আত, পত্র 7
 পণ্ড 7 পাত, গর্ত 7 গত্ত 7 গাত — ইত্যাদি । ঠিক উসাদে,
 অচ্ছ-ধাতুর 'চ্ছ' — এ যুক্ত বর্ণ এগোর 'চ' — বর্ণ উগো লোপ
 পানাই আগেকার অ-বর্ণ উগো দীর্ঘ অয়া 'আ' অইল ; ফলে
 ধাতু এহান 'আছ' — ধাতুত পরিণত অইলতা ।

প্রাকৃতর এ অচ্ছ-ধাতু এগো কুম্পেইত্ত আহিল-এ
 সম্বন্ধে পণ্ডিতর ভিতরে মতভেদ আছে । বরকটির মতে ধাতু
 এগো আহেছেতা সংস্কৃত অস্-ধাতুত্ত (ডঃ অস্তুরচ্ছঃ -
 প্রাকৃতপ্রকাশ ১২. ১৯) । কিন্তু আধুনিক পণ্ডিতে এহান
 নাকরতারা ; কারণ অস্-ধাতুর 'স'-উগো 'চ্ছ' — অনার কোনো
 নিয়ম বা ধারা নেই । জার্মান পণ্ডিত পিশেল গিরকে সংস্কৃত
 ঋ-ধাতুর ঋচ্ছ-রূপেত্ত ধাতু এগোর ব্যুৎপত্তি দেহার । সংস্কৃত
 'ঋ'-ধ্বনি প্রাকৃতত 'অ'-ধ্বনিত পরিণত অনা পারের ।
 গতিকে ঋ-চ্ছ রূপেত্ত অচ্ছ-ধাতু অনা যাকরের । কিন্তু এহানো
 সমর্থনযোগ্যহান নাগই । কারণ ঋ-ধাতুর অর্থ 'যানা'
 (to go) ; অত্থপক্ষে অচ্ছ-ধাতুর অর্থ 'অনা' বা 'থানা'
 (to be) । ডঃ সুনীতি চাটার্জি আদি পণ্ডিতে সংস্কৃততেই
 'অচ্ছ'-ধাতু আগো আছিল বুলিয়া কল্পনা করতারা । এহানেই
 হাবিত্ত যুক্তিযুক্ত মতহান । এমত যাকরলে বরকটির সূত্র
 উহানর অর্থহান অইতইতাই — 'অস্-ধাতুর ফামে অচ্ছ-ধাতুর
 আদেশ অর' । যেতাউ অক, এসাদে মতভেদ থাইলেউ, এহান
 সর্বজনস্বীকৃতহান যে, প্রাকৃতত অস্-ধাতু নেয়োছিল ; ঐ ধাতুর
 অর্থত আছিলতা — অচ্ছ-ধাতু । সূত্রাং সংস্কৃত-প্রাকৃত অচ্ছ-
 ধাতুত্ত বি.ম.-ত আছ-ধাতু আহেছে — এ বিষয়ে বিন্দু আহানো

সন্দেহ থানার অবসর নেই। এ ক্ষেত্রে দ্বিমত পোষন করানি উহান জঘন্য হেঁকঠেলাহান ছাড়া কিখ খানো নাগই।

সংস্কৃত অস্ - ধাতু আছ - বাণ্, আহেছে বুললেউ প্রাকৃত অচ্চ - ধাতুর মাধ্যমেই আহেছে বুলিয়া স্বীকার করানি লাগতই। গতিকে আচ্ - ধাতুর বানানখানো ছ - বর্নলো অনা লাগতই। কারণ, তদ্রূপ শব্দর ক্ষেত্রে উচ্চারণ বা বানান নির্ধারিত অরতা প্রাকৃত রূপর অনুযায়ী - উপেই সংস্কৃত বানানহান বেহানো অয়াউ থাক। দৃষ্টান্ত - স্বরূপে চৈক - সং. মৎস্য > প্রা. মচ্চ > মাছ, সং. বৎস - রূপ > প্রা. বচ্চ - র.অ > বাছুর, সং. বৎসর > প্রা. বচ্ছর > বছর, সং. গ্রঙ্গ > প্রা. গচ্চ > গাছ, সং. নৃত্যক > প্রা. নচ্চয় > নাছা, সং. কৃত্যগারিক > কচ্ছাআরিঅ > কাছারি ইত্যাদি। তর্কর খাতিরে সংস্কৃত সুজাসুজি বি.ম. ধাতু আহের বুলিয়া যাকলেউ সংস্কৃত অস্ ধাতু বি. ম. আস্ - ধাতু আহে ছুরারের। কারণ, প্রথমতঃ অস্ - ধাতুর 'অ' - উগো দীর্ঘ অয়া 'আ' - অনার কুনো সূত্র নেই। দ্বিতীয়তঃ সংস্কৃত বারোপ্রাকৃত শব্দ বা ধাতুর স - ধনি উগো বি. ম. - ত সাধারণতঃ হ-ধনিত পরিণত অর, বা লুপ্ত অর। অক্ষরনির ক্ষেত্রে নিয়ম এহান অবশ্যস্তাবীহান, যেমন, হাস 7 অহ্ (to lough), বস 7 বহ্ (to sit), আবিশ 7 আহ্ (to come), ভাস > বাহ্ (to float), কাস > কাহ্ (to cough) ইত্যাদি। গতিকে সংস্কৃত অস্ - ধাতু বি.ম.-ত আহে থাইলে অবশ্যই 'অহ্'বা 'অ' অইল অইচ্।

অনেকে বারো আচস্থিতে সংস্কৃত আস্ - ধাতু আগো দেহে বেলেয়া আছে, আছিল ইত্যাদি ক্রিয়ার ধাতু আচ্ -

উগো সংস্কৃত আস্-ধাতুত আছেছে বুলিয়া বাখ্যা করলে
 তানুর দহ্য-স-বাদর ইজ্জতহান টিকতই বুলিয়া নিওকরতারা।
 এপেই আমার বক্তব্যহানি এহানি : প্রথমতঃ, সংস্কৃত আস্-
 ধাতু বি. ম.-ত আহিলে আস্-রূপে থানা তুরারের; আগর
 সূত্র অনুযায়ী সংস্কৃত আস্-ধাতু বি.ম.-ত 'আহিলে 'আহ্' বা
 'আ' অনাত বাধা। দ্বিতীয়তঃ, সংস্কৃত আস্-ধাতুর অর্থ 'বহানি',
 কিন্তু বি. ম. আছ-ধাতুর অর্থ 'থানা'। এসাদে অর্থর ভেদ
 থানাই সংস্কৃত আস্-ধাতুত বি. ম. আছ-ধাতু আছে
 তুরারের। তৃতীয়তঃ, পেইরাককরে। শব্দ হহানর ভিতরে মিল
 দেহানিয়ে ঔগি বাপক-পুতকগি বুলানি উহান আশুটা বুদ্ধিহান
 ছাড়া কিত্তাউ নাগই। শব্দর ভিতরে বংশ পরম্পরা লেপ-
 করানি অইলে উতার ঐতিহাসিক বিবর্তনর সোপান উতা
 বর্তের। দেহরানি লাগের : বিবর্তনর বারাদে দৃষ্টি নাদিয়া
 আন্দাজে ভাষাতত্ত্ব নিকালানি অইলেতে আহো—আমিও
 হাজারহান বাখ্যা দিক : সং. ভাস > আস্, সং. বস > অস্ 7
 আস্, সং. আবিশ > আইশ্ > আস্, ইংরাজী রাজ (was)
 > আজ 7 আস্ ইত্যাদি। কিন্তু এসাদে উদ্ভাদর প্রলাপলো
 ভাষাতত্ত্ব নার।

আসলে, এসাদে আশুটা যুক্তিলো নিজর চেৎকরে ধরা
 আশুটা মত উহান সমর্থন করানির সালে অমাটিক হিনপানিত
 গুড়িগোত আছেতাই মনস্তত্ত্ব হুক্থান (১) 'আমার ধনোর
 কথা না লয়া তানুর গিরির কথাতে কিয়া লইতাঙাইতা ?'
 (২) 'তাতে কিগো হানতে ! মিযো কতোহান তাম
 করেছগোনা !' কিন্তু হারপেইবাঙ, দহ্য-স-বাদী গিরকগাছি,
 হেক ঠেলালো নিজর পাণ্ডিত্য-প্রদর্শনী' করাত যিতেগা এ

উদীয়মান ছক্কাও সাহিত্য এহানর ভিতরে অনর্থক যে বানানর
বিভ্রাট আহান আনেদিলাও, এহানর সম্পূর্ণ দায়িত্ব বারো কলঙ্ক
আপনারতা । এবাকাউ সুস্থাকিলো আহিক, হানিয়ে
যুক্তি অযায়ী ধারা আকহানলে চলিক ।



অন্য জাতের লগে বিবাহ সম্পর্কে—

সমস্য়াবল্লল বিষ্ণুপ্রিয়া মণিপুরী সমাজে বর্তমানে ডাঙর অগ্না দেহাদেছে সমস্য়া আহান অইলতায়—অগ্না জাতের নিঙোলর লগে এজাতের যুবকর বিয়া পাতানির প্রবণতা। যারগা তিনচারি বছরর ভিতরে বিষ্ণুপ্রিয়া মণিপুরী সমাজে হাগহান খেওয়া পড়া শুনা করেছি বা ধনেপুনে পালছি যুবক উতার প্রায় এক- তৃতীয়াংশ অগ্না জাতের নিঙোলরাও ঘর পাতলাগা, এবং নিকূলে আইতারা ঔজাত ডাঙরিয়া উতার ভিতরেউ অনেকগোয় ঔ পথ উগো ইলনিরকা কাকেই বেলাছি বুলিয়া খবর পেয়ার। আমার সমাজর যুবক এতার এসাদে মতিগতি এতা কিয়া অরতা. এতার পরিণতিহান কিহান এবং এ ব্যাপারে সমাজে কি প্রতিকার করানি লাগের—এ সম্বন্ধ মি ‘প্রবন্ধমালা’র দ্বিতীয় খণ্ডত অনেক ইঙ্গিত দেছু, খুচেগাউ অনেক কথা মাতেহু। কিন্তু কথা উতা বিষ্ণুপ্রিয়া মণিপুরীর কানে না হমার। গতিকে আজি ইমে ইজ্জু করে মা তাত উবা অইলু।

পইলাকার প্রশ্নহান অইলতায়—আমার যুবসমাজর ভিতরে অন্য জাতের নিঙোলর লগে বিয়া পাতানির প্রবণতা এহানর কারণহান কিহান? এহানর একমাত্র উত্তরহান—আমার সমাজে নিজর ভাষা - কৃষ্টি-পুষাক বেলেয়া অন্য জাতের ভাষা-কৃষ্টি-পুষাক লয়া ডাঙরিয়া মালনির যে জঘন্য আতলপা মানসিকতা আহান গুড়িগোত্ত আছে, উহানর পরিণতিহান এহান। বিষ্ণুপ্রিয়ার শ্রদ্ধেয় ডাঙরিয়া গাছির লক্ষণহানেই অইলতায়—মাতৃভাষা না ততারানি, তান্নর ইমাইন্দোলে নিজর পুষাক না পিদানি, বারো

নিজের কৃষ্টিরে হীনচক্ষে দেহানি । তানুরতা মিয়াও ঠার ততারলে
 বারো মিয়াও মালয়া নিকুললে ইজ্জত বাড়ের — ষ্টেণ্ডার্ড বাড়ের ।
 ফলে এসাদে পরিবারর জিপুতে পূর্ণবয়স্ক অনা সবেউ মাতৃভাষালো
 ততারা ছুরারতারা । ‘মোর শৌ এগিতে বাসায় বাসায় থায়া
 আমার ঠারহান ততারা ছুরারতারাতানা, আমার পুথাক পিদানি
 না হিকেছিতানা’ বুললে যেমন ইমা-বাবার গৌরবহান
 কতোহান গজেদে কার পারা । জাত এহানর প্রাণী এভারতা
 পৃথিবীর মাজে ইমে এহানেই বৈশিষ্ট্যহান — এহানেই শ্রেষ্ঠতাহান ।
 এসাদে নিজের মাতৃভাষা বারো কৃষ্টির প্রতি অনাদর বা ঘৃণা
 বারো অন্যজাতর ভাষাকৃষ্টির প্রতি অকৈতব ভক্তির পরিবেশ
 আহান সৃষ্টি করানির ফলে আমার ডাঙরিয়াগাছির পুত্রর
 উতারতা ও ভক্তিযোগা জাত উতার দৌগিথানক গাছির সেবাত
 নিজরে নিযুক্ত করানির মনোভাব উহান স্বভাবতঃই আহের ।
 অর্থাৎ মি স্পষ্ট করে মাতানি মনাউরিয়াই — অন্যজাতর
 নিঙোলর প্রতি আমার যুবকর এ প্রেমাতুরাগ এহানরকা তানুর
 ইমা-বাবাই পইলা দায়ী ; তানুর ইমা-বাবাগাছিয়েই তানুর
 ভিতরে কনাকতো পুরি আমার ভাষাকৃষ্টির বিরোধী মনোভাব
 আহানর সৃষ্টি করেদিয়া তানুরে ও পথে আগুয়া দিতারাতা ।
 অবশ্যই, ইমা-বাবায় এসাদে পরিবেশ আহানর সৃষ্টি বরলেউ নবা
 যুবকে অন্ততঃ শিক্ষা লাভ করানির পিছে অন্য জাতর রীতিনীতি
 দেহিয়া খানিমানি হিকানি লাগেছিল । কিন্তু যুবসমাজো
 উদ্ভ্রান্ত । নিজের জাতর পরিচয় গোপন করিয়া অন্য
 জাতরতা মালয়া ডাঙর সানিত তানু বাস্তু ; নিজের
 ভাষাকৃষ্টিলো ডাঙর অয়া অন্যজাতর সমান অনার দৃষ্টি-ভঙ্গি
 তানুর বিবেক বুদ্ধিত নাহের । গতিকে বর্তমান সমস্যার দ্বিতীয়

দায়িত্বহীন পড়েরতা উদ্ভাস্ত, বিবেকহীন যুব-সমাজের গজে ।

আমার শিক্ষিত যুব-সমাজে অন্য জাতের নিঙোলর লগে বিয়া পাতানির ফলে আমার সমাজের কিহান গতিহান অইলতা চেইক : আকবেদে যেতায় এসাদে বিয়া পাততারা উতা বিয়ার আগেই আদা-মিয়াও অয়া থাইতারা; বিয়ার পিছে দেবীভক্তির ফলে বাকী আদা উহান পূরণ অর । ফলে, উতা আমার ভাষাকৃষ্টি পুরি নিচুত অইতারা । আরাক আকবেদে আমার অনেক শিক্ষিত নিঙোলরতা পাত্রর অভাবে বিয়া নায়া থার । ঐ কারণে পরিশেষে আমার শিক্ষিত নিঙোলেউ শিক্ষিত যুবকর অন্তরসরণে অন্য জাতের যুবকরাও যানাত বাধ্য অইতাই এবং আমার ভাষাকৃষ্টি এরা দিতাই । এমনেই সংখ্যায় কম জাতহান ! বাংলাদেশে আমারতা যেতা আছি, উতার ভবিষ্যৎ অন্ধকার ; মণিপুরর জিরিবাম-লেইসাবিথলে আছি উতাউ আমার মাতৃভাষা বেলানির পথে । উতার গজে আমার শিক্ষিত যুবক-নিঙোলর ডাঙর অংশ আহান যদি নিজর ভাষাকৃষ্টি বেলেয়া অন্য জাতের ভাষাকৃষ্টি লইতারা, উহান অইলে এ সমাজের ভাষাকৃষ্টি কুংগোই রক্ষা করতই ? কারেলো সমাজ এহান পালইতই ?

গতিকে অন্যজাতের নিঙোলর লগে বিয়া পাতানির যে প্রবণতাহান সমাজে দেহা দেছে, এহান একবাকাই নির্মূল করানি লাগের । কিন্তু কিসাদে করানি ? এ ব্যাপারে পইলাকার দায়িত্বহান পড়েরতা যুবকর ইমা-বাবার গজে । তানু নিজে আচরণ করিয়া তানুর জিপুতর ভিতরে নিজর ভাষাকৃষ্টির প্রতি সমাদরর বীজ রুড়া দেনা লাগতই; আমার ভাষা-সাহিত্যর প্রতি তানুরে আকৃষ্ট করানি লাগতই; আমার কৃষ্টির দুর্গতি

বারো ভাষা সাহিত্যর অনুরত অবস্থার বিষয়ে তানুরে সচেতন
 করিয়া এতার উন্নতিকল্পে যথাসাধা প্রচেষ্টা করানিরকা তানুরে
 উৎসাহিত করানি লাগতই; তানুর ভিতরে জাতীয় চেতনা
 আনেদেনা লাগতই। শিক্ষিত যুবকর প্রতিও অনুরোধহান—
 তানু যেন অত্যাশ্র উন্নত জাতর ভাষা-সাহিত্য-কৃষ্টির উন্নত
 অবস্থার লগে আমার ভাষা-সাহিত্য-কৃষ্টির দীনহীন অবস্থার
 তুলনা করিয়া লাজপানি হিককা এবং নিজর ভাষা-সাহিত্য-
 কৃষ্টির উন্নতি করিয়া অন্য জাতর লগে সমান অনারকা যথা-
 সাধা চেষ্টা করকা; তানু এহান উপলব্ধি করকা যে নিজর
 ভাষা-কৃষ্টি বিসর্জন দিয়া, অন্যর অনুকরণ করিয়া কুনোগোই
 ডাঙর অনা নুরারতারা; তানু হারপানি হিককা যে অন্য
 জাতর নিঙোলরাও নিজর ভাষাকৃষ্টি এরেদিয়া কুনোগো মনুষ্য
 পদবাচ্য অনা নুরারতারা।

অন্য জাতর ভাষা-কৃষ্টি পুষাকর ভক্ত, অন্য জাতর
 নিঙোলর প্রেমে বিগলিত অয়া তানুরাও যেহায় আত্মসমর্পণে
 তৎপর, বারো নব্যশিক্ষার প্রভাবে ইঙালঙাল অছি গিরিগিথানিয়ে
 মাততারা—অন্যজাতর ভাষা-কৃষ্টি-পুষাক অনুকরণর বারো
 অন্য জাতর লগে বিয়া পাতানির বিরুদ্ধে লৌদিয়ার ‘আমি’
 এতা উনি মিয়াম রক্ষণশীল, সঙ্কীর্ণমনা বারো কুপমণ্ডক
 বারো তানুগাছি উনি মিয়াম বিশ্বপ্রেমিক, সাম্যবাদী,
 প্রগতিবাদী। তানুর মতে উনি ‘আমার জাত, মানুর জাত’বুলানি
 এহান মিয়াম ছুঁকাও কথাহান, কারণ মানুরে মানুরে কুনো ভেদ
 নেই উনি। তানু উনি আহি মেলিয়া দেহেছিতা—পৃথিবীর হাবি
 জাত্রেউ অত্যাশ্র জাতর ভাষা-কৃষ্টি-পুষাক লনার, বারো অত্যাশ্র জাতর
 লগে বিয়া পাতানির প্রচলন আছে। উহানে উনি তানু ও অত্যাশ্র

জাতর অনুকরণ করিয়া ডাঙর অইতা ! বেশ , মিয়াম হবা কথা হান ! হায়দে, আমারে দৃষ্টান্ত আহান দেহেইতা— পৃথিবীর কিসাদে জাতহানর শিক্ষিতর শতকরা নব্বই ভাগ মানুরে নিজর ভাষা-কৃষ্টি পুষাকরে তুচ্ছতা জিলা করতারা - নিজর ভাষালো ততারতে, বারো নিজর পুষাক পিদতে লাজপেইতারাতা । আমারে দেহেইতা— কিসাদে জাতর যুবকে অন্য জাতর নিঙোলরাঙ ঘর পাতিয়া নিজর মাতৃভাষা বেলেয়া স্ত্রীভাষা লইতারাতা ।

ইমাইন্দোলর পুষাকর ক্ষেত্রত বারো প্রশ্ন আহান তুলতারা— খুশে সাহেবর পুষাক পিদতেতে আপত্তি নাকরানি, নিঙোলর ক্ষেত্রততে এসাদে বাধা নিষেধর কিহান দরকার ? তানুর মতে, নিঙোলর ক্ষেত্রত এসাদে বাধানিষেধ আনানি এহান উনি তানুরে ছর্কাঙ করানিহান । কিন্তু গিরকগাছি ! এসাদে কথার উত্তর গায়শাপ্রলো— লজিকলো নার. এতা মানুর মনস্তত্ত্বর বা স্বাভাবিক মানসিকতার কথা । ঘর আগোত ইমাইন্দোল নেয়ইলে ঘর উগো কিয়া নীরস নীরস লাগেরতা ? ইমাইন্দোলে রাধিয়া পুড়িয়া না খৌরেইলে বা সেবাসুশ্রুশা না করলে অতিথি আগোয় কিয়া আনন্দ নাপারতা ? কারণ— সৌন্দর্য, কমনীয়তা বারো প্রেম- প্রীতির প্রকাশ স্বরূপ নারীয়েই ঘরর সৌন্দর্য রক্ষা করতারা ঠিক উসাদে, সমাজর আভ্যন্তরীন সৌন্দর্য বারো কৃষ্টি রক্ষা করতারা ইমা - ইন্দোলে । এহান ইমাইন্দোলরে ছর্কাঙ করানিহান নাগই , এহান তানুরে গৌরবময় আসনে প্রতিষ্ঠিত করানিহান বারো আমার বক্তব্য এতার আগাঙড়ি অনুধাবন করলে হারপেইতাঙাই যে— আমার আসল বক্তব্যহান অন্য জাতর পুষাক পিদানির বিরুদ্ধে নাগই; আমার বক্তব্যহান অইলতায়— যে মানসিকতালো ডাঙরিয়া গিরিগিথানিয়ে নিজর

পুষাকরে তুচ্ছতাচ্ছল্য করিয়া অণু জাতর পুষাক পিদিয়া তায় গোপন করানি মনেইতারা, ও আতলপা মনোবৃত্তি উহানর বিরুদ্ধে ।

শিলচরর হিঙ্গারীর বিয়া আহানাত ডাঙরিয়া পরিবারর বর দাপা আহানর নিঙোল ইমাইন্দোল উতা হাবিয়ে 'গাউরা পুষাক আলিপেয়া একেপণে হাবিহানে মিয়াঙ মালয়া গেছিলাগা বুলিয়া হিঙ্গারীর নিঙোলে—যুবকে প্রতিবাদ জানেইলা । তথাপি প্রতিবাদ উতা গ্রাহ্য না করিয়া তানু বিয়ার মাঙপে হমেইলাগা বুলিয়া হিঙ্গারীর যুবক উতায় বিয়ার মাঙপে হিল উড়েইলা । হিঙ্গারীর যুবকর কাম উহান উনি মিয়াম নীচতার দৃষ্টান্তহান—প্রগতিবাদী গিরিগিথানিয়ে মাততারা তা । হায়দে প্রগতিশীল গিরকগাছি, মিয়াঙর বিয়া আহানাত তানুর ইমাইন্দোল নিঙোল উতা হাবিয়ে মনিপুরী পুষাক বা অসমীয়া পুষাক পিদিয়া যাকাগাতা চেইক, উতায় হিলর উড়া খেইতারতা, না ক্রীপদভ্রমণর উড়া খেইতারতা ! বারো দেহেইকতা—বিয়ার দাপা আহান হাবিয়ে অণু জাতর পুষাক পিদিয়া বিয়ার মাঙপে যানার দৃষ্টান্ত আহান আর কুনো জাতে আছেনই । নিজর জঘন্য নীচতা উহানরে প্রলেপ দিয়া অন্যর গজে দোষারোপ না করিয়ো । নিজর ভাষা কৃষ্টি পুষাকরে ধরিয়া থনার বা শ্রদ্ধা করানির, সপক্ষে এবং তত্তজাতর লগে বিয়া পাতানির বিরুদ্ধে মাতিয়ার কথা এতা রক্ষনশীলর কথা বুলিয়া যেতায় মাততারা, উতার প্রতি বক্তবাহান—গিরকগাছি এতা রক্ষনশীলর কথা, না প্রগতিশীলর কথা, উহান হারপেই-তারাইতা তুমার আতলপা মনোবৃত্তি এতা গিয়া বিবেকজ্ঞান আহিতই উবাকা । বঙ্গদেশে যেবাকা নব্যশিক্ষিত হাবি গইগো অয়া সাহেব অনাত ছুটেছিলো, উবাকা বন্ধিমচন্দ্র চন্দ্রচন্দ্র গাছিয়ে

নিজৰ ভাষা কৃষ্টি ৰক্ষাৰকা বাপিয়া পড়লা। ঔদিনো ঔ সাহেব
 মালপা জীব উতারাও বজ্জিমচন্দ্র-ঈশ্বরচন্দ্র গাছি ৰক্ষণশীল বুলিয়া
 নিন্দিত অছিল। কিন্তু আসলে তানূৰ ভাবধারা উতায়ই বঙ্গীয়
 সমাজে নবজাগরণ আনেদিনো। এপেয়ো উসাদে অন্য উহান
 অবশ্যস্তাবীহান। প্রগতিশীল গিরক গাছিয়ে দেহা পারবাঙতা—
 কিসাদে প্রগতিশীল সমাজে নিজৰ ভাষাকৃষ্টি বেলেয়া ডাঙৰ
 অছিতা? প্রগতিশীল অইতারাভা—নিজৰ ভাষাকৃষ্টিৰ সমাক ৰক্ষা
 করিয়া, বারো অতার হবা কৃষ্টি লয়া—নিজৰ ভাষাকৃষ্টি বিসর্জন
 দিয়া নাগই। অথানা জাতে অন্য জাতৰ লগে বিয়া পাতিতারাভা
 বীরৰ সাদে—প্রভূৰ সাদে—নিজৰ ভাষা-কৃষ্টি-পুষাক হাবিতা
 বজায় থয়া। বিষ্ণুপ্রিয়ামণিপুৰী অন্যজাতৰ লগে বিয়া পাতিতারাভা
 দাসহরতিলো—নিজৰ ভাষা কৃষ্টি-পুষাকৰে ঘনা করিয়া—বিসর্জন
 দিয়া। নিজৰ দাসহরতিৰে—ত্বৰলতাবে গুরিয়া থয়া বিশ্বমানবতার
 অভিনয় করানি উহান অনাবত ভণামিহান, অকৃত্রাহান ছাড়া
 কিডাউ নাগই।

অন্তজাতৰ নিঙোলৰ লগে বিয়া পাতেছি কুনো কুনো যুবক
 ইমা বাবায় উনি বোঁৱেইৰ সেৱাত ননীৰ সাদে গলেছি। ঔ ইমা-
 বাবা উতায় বারো সমাজৰ চরিতহবা মানু উতায়নতিলয়া উনি
 বিবাহিত দম্পতি উতাবে সমাজে গ্রহন করানিরকা আতহানি
 দীঘল করিয়া ডাহাত লাগেছি। কিন্তু উতাবে সমাজে গৃহণ
 করলে কিহান লাভ অইতই? আমাৰ ভাষাকৃষ্টিৰে ঘনা করিয়া
 অতার ভাষাকৃষ্টিৰ ভক্ত অছি উতাবে ‘আমাৰ সমাজে তুললাঙ’
 বুললে আমাৰ ভাষাকৃষ্টিৰ বিন্দু আহানো লাভ অনাৰ সম্ভাবনা
 নেই। পকান্তৰে তাম্বুৰে সমাজে হমানিৰ সুযোগ দিলে এমনেউ
 ‘কুৰাকা কিতা মিয়াঙ মালইবাঙতা’ বুলিয়া আছি আমাৰ ডাঙৰি-

যার জিপুত হাবি গুরুদাপার সাদে ইরুইসাও বাধিয়া মিয়াওর
 নিঙোলর পুজারী অনাত ছুটতাই । ফলে আমার শিক্ষিত
 নিঙোলরেউ অন্য জাতরাও এরেনেদেনাত বাধ্য অইতাঙাই ।
 যারগা কতো বছরর ভিতরে অন্য জাতর নিঙোলর সেবারী
 এতা কিতায়া অমাটিক মিয়াম অইলাতা ? গিরিগিথানিয়ে
 খালকরলে হারপেইতাঙাই যে, 'অন্য জাতর নিঙোলরাও
 গেছিগা উতারে সমাজে তুলানি অক' বুলিয়া সমাজে যে
 হারা আহানি চলেছে, উহানর ফলহান এহান । সুতরাং এ
 গিরকগাছি এতারে সামাজিকভাবে গ্রহণ করলে সমাজর
 শিক্ষিত যুবক -- নিঙোল হাবি ইমে পুলাপ বিসর্জন
 দেনাত পড়তাঙাই । অন্যান্য জাতর বিধান - অনজাতর
 চিকিৎসা বিষ্ণুপ্রিয়া সমাজে না খাটতই । আগে অন্য জাতর
 সাদে নিজর ভাষাকৃষ্টির প্রতি শ্রদ্ধা করানি হিকো, অন্য জাতর
 লগে সমান অই, উতার পিছে তানুর বিয়ার অনুকরন করিয়ো।
 লমইতেগা কথা আহান --এসাদে আলোচনা এতাসভ্যসমাজর
 দৃষ্টিলো মিয়াম হুর্কাও, সন্ধীন আলোচনা । কিন্তু উপায় নেই।
 সমাজর নীচ দৃষ্টিভঙ্গির দরুন এসাদে কথা বাধ্য অয়া মাতানি
 লাগের । এহানরকা মি ক্ষমা চাউরি ।



